

Ngoenzseng Mehlungz Vuzcouh

□ Dangz Yuzyingz cingjeix



▲ Vunzlai angqhoh ngoenz-seng mehlungz, “mehlungz” (vunz yienj)hwnjciengz.

► Siengqrin mehlungz daengj youq gwnz gvangjangz.

◀ Giz bakdou daeuz aen miuh mehlungz.



▲ “Mehlungz” naengh ruz-lungz cunzyouz.



▲ Vunzlai angqhoh ngoenz-seng mehlungz, gaem fan raiz miz vahcoenz gouz ndei.



▲ Vunzlai angqhoh ngoenzseng mehlungz, diuq fouxsaeeij.

Youq Vuzcouh, vwnzva meh-duzlungz (baihlaeng cungj heuhguh mehlungz) miz haujlai nanz lo, vunz ndawbiengz simsaenq mehlungz caeuq gingqbaic mehlungz, aeu neix guhdaeuz swncienz vwnzva mehlungz. Vuzcouh miuhmehlunz youq Ciuhbwzsung mboengq hainduj couh miz vunz cauhlaeb, aen miuh neix baenz giz bingzdaiz naekhung hawj vunz ndawbiengz daihdaih swncienz vwnzva mehlungz caeuq guh hozdung baiq mehlungz.

Ciuq vunz ndawbiengz cienz-gangj, mehlungz dwg bouxmehmbwk geizheih ndeu, de heuhguh Vwnh Au. De baez doekfag le, couh miz byoem ndaemnetnet raez cik lai bae, goetndang hung dangqmaz, fajnaj gyaeunde raixcaix. De lij miz simhoz hawj vunzbiengz engqgya in' gyaez, de baenz vunz simsoh hozndei; de lij iq couh guhmieng naeuz: Yaek haenqrengz hawj ndawbiengz youq-ndei, coengh vunzbiengz guh saehndei. Youq mboengq lij oi,

Vwnh Au riengz bohme daengz Guengjdoeng Cauging Yezcwnz youq roengzdaeuj, baengh daemj-baengz dwkbya gwn. Daengzlaeng, Vwnh Au daiq gyoengq beixnuengx mbanjranz hwnj bya roengz doengh, hai reih guh naz, gaemguen caemh-caiq dingj gij cainanh raemxrongz Dabsihgyangh, hai uk haenqrengz hawj vunzlai vuenyungz, hawj ndawbiengz ndaej onjndei, neix de ndaej vunzlai hauejcoengh couh baenz bouxdaeuz Canghvuvcuz. Youq gaxgonq gunghyenz 211 nienz lig-gaeuq bet nyied cibngux, Vwnh Au yaek bae gingsingz lo, de daj Yezcwnz naengh ruz ginggvaq Vuzcouh bae Gveilinz, youq gyang-roen baenzbingh lo couh deng dauq daengz Yezcwnz le dai bae, ciuh vunz ndaejgyaeu 79 bi.

Ciuq vunz cienzgangj de ciengx haj duzlungz, haj duzlungz neix maj-hung le, de youh baengh gyoengqde hemq rumz heuh fwn, hai bya nda raemx, ceiqleix Dabsihgyangh, hawj vunzlai souh'ik, neix de ndaej heuhguh mehlungz. Daj Ciuhcenz daengz Ciuhcingh, gak boux vuenz-daeq cungj fung cwngheuh hawj mehlungz, vunzbiengz gingqbaic mehlungz, vunzlai yienghneix guh couhdwg siengjmuengh gvaq ndaej onj gvaq ndaej ndei. Vunz ciuhlaeng vihliux geiqniemh mehlungz, couh youq ranghdieg aeu Guengjdoeng Cauging Yezcwnz caeuq Guengjsae Vuzcouh guh daeuz, youq ranghdieg henz Dabsihgyangh caeuq daengx guek gak dieg cauhlaeb haujlai miuhmehlunz. Mehlungz youq ranghdieg Dahcuhyangh, daegbied youq Yanggangj Aumwnz, mizmingz dangqmaz.

Ngoenzseng mehlungz, dwg ngoenz vunzlai geiqniemh ngoenzseng mehlungz caeuq ngoenz mehlungz “hwnj mbwn”. Guh hozdung hoh

ngoenzseng mehlungz miz “ngoenz-seng” caeuq “ngoenz hwnj mbwn” song mboengq. Ciuq vunz naeuz “ngoenzseng” dwg ngoenz mehlungz doekfag, vunzbiengz dingh liggaeuq ngux nyied cobet guh ngoenzdaeuz, daj coit daengz cocib gungh cib ngoenz neix, cungj dwg mboengq “hoh ngoenzseng”; ciuq vunz naeuz “ngoenz hwnj mbwn” dwg ngoenz mehlungz “hwnj mbwn”, dingh liggaeuq bet nyied cibngux guh ngoenzdaeuz, daj cibseiq daengz cibloeg gungh sam ngoenz neix, cungj dwg mboengq “hoh ngoenz mehlungz hwnj mbwn”. Guh hozdung “hoh ngoenz mehlungz doekfag” vunz ceiq lai, hix ceiq nauhyied. Daengz ngoenzdaeuz hoh mehlungz doekfag haenx, miz haujlai hekyieng(boux siuyieng baiq mehlungz) daj duenh baihgwnz ranghdieg Dahcuhyangh baugvat Baksae, Lungzcouh, Namz-ningz, Liujcouh, Gveilinz, Gveigangj, duenh baihlaj ranghdieg Dahcuhyangh baugvat Guengjcou, Yanggangj, Aumwnz daengj daeuj, gyoengqde sam haj boux baenz gyoengq roxnaeuz gyoebcomz baenz “aenduenz (aendoih) hoh mehlungz doekfag”, daeuj yawj caeuq baiq mehlungz. Youq mboengq guh hozdung hoh mehlungz doekfag, gyoengq hekyieng mbwkmbwk saisai cungj baiq mehlungz simcingh aeueiq dangqmaz, miz vunz soengq hawj ndangdaenj mehlungz, miz vunz hawj cienzyieng cienzyouz, miz vunz cawx siengq mehlungz caeuq mbaw fug, lij miz vunz soengq doxgaiq gim vunz raekdawz haenx, gaenxmaenx dangqmaz.

Bi 2007, ngoenzseng mehlungz Vuzcouh ginggvaq Gvangjsih Boux-cuengh Swcigh Yinzminz Cwngfuj baecinj, ndaej liedhaeuj daih'it buek swcigh gaep feihvuzciz vwnzva yizcanj mingzloeg.



▲ Siu yieng baiq mehlungz gouz vuenyungz.